

秘本醫學叢書

裘庆元輯

裘慶元輯

秘本醫學叢書

(一)

上海書店

發背對口治訣論

發背對口治訣 提要

本書一卷清謝邃喬先生所著並謝氏世傳外科秘法一卷附以揚州存濟堂藥局膏方爲其孫翼爲先生在道光年間輯印以分送友人惟板毀書鮮流傳本社裘吉生君爰將所藏手鈔本刊行因其間完全屬經驗之方近來中醫外科退步凡遇發背對口之大症往往束手西醫之有學問而收覓古方者又日見其多裘君不自秘以供中西醫者之求微特爲謝氏傳書也

謝氏發背對口治訣序

發背對口治訣先大父遂喬公所著也先大父性穎悟好讀書常以濟世爲念敦學不怠屢困棘闈及先伯父香伯公舉於鄉始無意進取惟讀書以自娛暇則講求岐黃曰士不能得志是亦濟世之一道也通內外科多所闡發每視病必矜重四方延請雖遠必至卻饋遺貧困者以藥助之嘗爲人治發背對口諸證以古人之法投之多不效沈思其故曰是非古人之欺我也特未通其變耳夫一證之成其受病必有偏重之處審其所偏重而切治則效可立見也自是凡治此證必辨其位之左右上下色之赤白深淺脈之浮沉遲速以審其經絡腑臟竅穴之所係與夫陰陽虛實淫鬱燥溼之所歸而復參之天時相其地宜以制五行生克之用取古人之法損益變化以通之於是所治罔不效旣而先伯父迎養琴江署舍多暇乃取歷年醫案裁定發背對口治訣幾卷附錄經驗

幾卷及歸而授之先君曰此書未經人道勿輕視之藝雖小亦足以濟世矣先君東環公暨先叔父東揆公亦皆以儒術通素理先君久戰北闕未遑展施先叔父以是道行世善用先大父遺法故所治多奇而中今先君先叔父相繼逝世矣爲與諸弟皆材劣不能通一藝先人之書具在徒使置而勿用是先人濟世之志至爲等而中絕也楊君子逸夙聞是書勉余歆梓余欣然從之庶幾先人遺術傳播四方高明之士鑒而採擇焉未必不有補於世雖未能述先世之事猶不失先世之志也夫

道光二十年仲春七日孫翼爲謹序

秘本醫學叢書第六冊目錄

發背對口治訣論

傷科方書

治痢捷要新書

脚氣治法總要

和緩遺風

素問校義

集驗背疽方

證治心傳

中風論

伏瘟證治實驗談

金氏門診案

琉球問答奇病論

肯堂醫論

長沙證彙

發背對口治訣論

毗陵蘧喬謝應材著

孫翼爲且魯校

裘慶元吉生刊

對口發背不拘偏正只謂形色色忌晦滯貴淡紅明潤形忌歪邪平塌要尖圓高突所以高爲陽下爲陰紅爲陽白爲陰有肌膚受寒毒雖高聳而亦白者須用柴葛解肌或時當寒甚用淨蘇葉溫解使之重汗俾邪從汗解若痛在筋骨外不現形肉色如故兩脉或弦硬細緊沉伏細滑則爲流注須用蒼陳朴草蘇葉不效再用麻黃薑桂附子以解之麻黃不拘分量數分起至二錢爲止有乾鶴膝小腿不但不腫脹併其上大肉盡去膝轉看得極大麻黃一服即用三錢對口不拘左右以升陽火爲主右初起柴胡川芎可稍緩即用升麻左初起升麻可稍緩且先用柴葛解肌湯若自左腫之右自右腫之初一服升柴川芎並

用桔梗不拘左右用錢外至錢半爲止使之載諸藥而上浮凡耳後腦骨中間軟堂正中必用獨活以提腎毒對口在頭頭爲諸陽之首雖不高聳亦不以陰論止重用發散間有時值嚴寒無汗不解用麻黃三五分炒黑而桂附等藥不用發背亦然發背并不宜重用發散倘至大潰之後亦清補者多對乳以上用桔梗對乳以下不用對口右升麻左柴胡乃其君也若火勢炎甚身熱如炙痛楚非常川芎不用經云川芎佐清陽而升頭角火炎者宜戒火熱大痛極紅而老僮升陽散火無效一面重加升麻一面加大黃一二錢謂之將軍定痛散發背若大痛楚亦用定痛散毒有遊紅嫩紅散脚紅紅而帶紫如豬肝色重則用青皮柴胡以疏肝氣輕則用柴胡白蒺藜丹皮以平之遊紅係絳紅色亦帶紫是血分稍虧陰火上發輕則用玄參二三錢如夜加痛楚發熱則用生地二三錢以滋陰非此不可擅用恐導邪入腎當歸去瘀生新新會皮和中補胃二味

人稱外科勝藥病未退切不可擅用能導邪入胃乳香沒藥能和氣血亦能損胃胃弱者亦戒至麻黃薑桂說之已詳大寒如知柏芩連用亦甚少非身熱不退不用黃芩非乾惡神情煩躁身熱如爐不用黃連非口中大苦舌苔焦黃而作渴不用知母小便短赤眼睛淚熱方用黃柏鹽水炒脾善唇滋潤肝善身輕便肺善聲音响心善精神爽腎善水稀長是謂五善更有七惡一惡神昏憤二惡腰身強三惡形消瘦四惡皮膚槁五惡成消渴六惡身浮腫七惡瘡倒陷外科正宗善惡論患處梗實如同負重形色晦暗歪邪平塌隱然有黑色在肌肉間是毒藏於胃不治何則胃主肌肉肺主皮毛且肺屬金胃屬土土爲金母煩躁而指頭不紅肝病神昏心病口中無味乾弔惡而飲食不貪脾病肌膚不潤毛髮乾枯而多痰肺病小水短赤骨節疼痛夜不成眠飲食不消大便不實腎病毒色如豬肝無膿者死潰而不爛最忌起葡萄之肉腫毒亦腫者佳肉腫毒

不腫者死去腐生新形如石榴子者佳腐肉已脫而有紅絲絲於其上者死新肉如板片不進食者死又有毒已潰爛根脚尙不清楚膿勢亦不湧出飲食不貪欲攻而毒已潰爛身軀已弱欲補而根脚不清膿不湧食不貪肺胃邪不退攻補兩難經云攻則死補亦亡謂和六腑最爲良更有新肉已滿外口亦閉按之不實如皮袋狀不治凡至根脚清痛減膿雖未湧不妨少用生芪以佐膿根脚清毒軟痛止急用灸黃芪山藥合八珍湯扶正却邪有受寒板痛毒清消時不消膿時停（似有誤字）用柴葛白芷以解之有重用蘇葉合真人活命飲解之有受暑而然者用六一散香薷合真人活命飲有房欲反覆未潰未膿用獨活合柴葛湯與活命飲既潰既膿用川斷製首烏輕用活命飲有受氣而然者已潰未潰俱用柴胡青皮鬱金香附未潰合活命飲已潰輕用受風而反覆名爲破傷風不治者頗有已潰用揀冬二三錢八珍兼活命飲未潰用黃芩柴

葛與活命飲婦人產後不可脫去生化湯胎前帶下黃芩白朮苧麻根不可擅用甲片有白淋者用石羔腐炒黑爲引赤淋用鹽漬腐炒黑或用龜板或用烏羔潰後用川斷台朮大熟地男婦兼血證引加童便一大杯或男人遺精加蓮鬚芡實潰後用連皮建蓮爲引有傷魚積青果一枚爲引肉積臘肉骨灰加山杏一飯積用麥芽神麴元米積用白酒元酒積用白葛花雞巨子麵積用白酒元厚朴芋頭積用陳酒瓜果積用草果麝香又有潰爛時受臭香感觸用羌活合活命飲有食冷復發用半夏陳皮沐浴受觸用柴葛竟有至痰喘氣急者加眞杜蘇子三錢炒研枳壳三錢炒毒有高聳而不紅不痛是爲陽中陰宜溫解有平塌而極紅極痛腐爛者是謂陰中陽宜清解凡毒至根脚清正四面不痛不硬患處亦軟陽宜清補陰宜溫補一切未潰以實論既潰以虛論又有根脚鬆散紅色甚嬌紅脚甚嫩如嫩肉狀且不疼痛患處雖未潰而亦軟舌上清皎

無苔是大虛之證發背雖在未潰一服卽用炙黃芪一兩夫補宜循序而進遲補傷元悞補則加痛與其悞補毋寧遲補如人本質不厚因遲補而膿不速者是大約將膿未膿可用生芪三錢漸加炙芪錢許膿出再加炙芪後不用生芪大潰大證芪用至七八錢甚有至一兩者大潰未有不氣血兩虧補氣用參芪補血用熟地補血之陽用當歸丹參毒至潰後補氣而外未有不急補腎水何則腎爲水水生木木生火火生土土生金是水爲方物之母腎右爲命門左爲水爲水火既濟潰後陽證清補川斷爲清補聖藥若當溫補而用川斷小水必蔽結清補至邪盡飲食將復舊必用大熟地溫補至飲食復舊亦可用熟地必用陳酒煮爛每兩加砂仁五六分清補亦用此法製又發背有陰陽虛實夾雜如肉腫瘡不腫者卽是虛實夾雜至形狀歪邪根脚模糊突起色白藥不見效是陰陽夾雜初起亦用溫散以觀動靜然後用人參一二分燉汁炒花粉肉桂

一二分燉汁炒瓜蒌仁餘則如常若患處微似青色而人易生怒氣亦用桂製瓜蒌仁如潰後煩怒用桂一二分燉汁拌炒白芍妙凡毒軟爲虛硬爲實更有腫脹不軟而亦不痛是邪在血分重用荊芥以疎血分之邪紅色過赤而老是血分之火用荊芥穗一二錢鹽水炒黑潰後精神弱不成寐用遠志肉開水泡白茯苓酸棗仁不效再引用龍眼肉氣血弱潰不收用萸肉錢外或二錢加炭白朮白芍土炒大便不實弱而不實色呆白腹不痛人懶倦用升麻數分白扁豆二三錢炒焦厚朴杜仲鹽水炒二三錢實而不食心口痛氣飽用藥隨所食之物以消之若痢疾胸氣不寬用炒枳殼重則佛手青皮加廣木香厚朴痢退亦用升麻以提其陽使之清升濁降用白扁豆以補其脾再後用杜仲以佐其火小便閉用車前二三株或蔗漿以利之忌食發物及生冷洗浴勞動傷悲氣憤遇寡婦最宜解鬱毒楚難禁用炒鳖甲片將石膏腐包好煑滾以平其燥烈

之氣治病必從其本食冷反覆輕則用砂仁以醒胃重則用半夏以燥胃病雖有萬殊救藥及反覆總歸一本

附謝氏外科秘法

辨證

色紅而高腫按之而即痛者爲陽色白而平板按之而不痛者爲陰色浮淡而根脚糝糊爲虛色沉著而根盤清正爲實色淡白青而板者爲寒色深紅紫而痛者爲熱審而治之斯爲得矣

治訣

補則死攻則亡調和六腑最爲良

治法

凡初起但用攻發消去即了不必補托若將作膿方可內托見證

伏陰證（外軟內硬按之而後通者）伏陽證（外硬內軟按之即痛者）半陰半

陽證（或外軟內硬而按之即痛或內軟外硬按之而反不痛或形屬陽而色屬陰或色屬陽而形反屬陰是皆陰陽錯亂治無適從）法宜調和藏府燮理陰陽皆用製甘草爲君秘傳君相通神（審證之輕重投劑之大小慎勿誤投自取背戾）

大劑大甘草一兩瓜蒌仁八錢甲片四錢中劑大甘草八錢瓜蒌仁六錢甲片三錢小劑大甘草六錢瓜蒌仁四錢甲片二錢更重者加金銀子（左三十五粒右四十粒）日輕夜重者加炒黑荊芥二錢極痛而不大便者加炒黑大黃二錢肉內陷者花粉用人參製色青紫者瓜蒌仁用肉桂製惡心者加開口椒四十九粒
凡初起方

大貝二錢白芷一錢花粉三錢大甘草六錢瓜蒌仁四錢炒研甲片二錢